

పాలు తిమోతికు రాసిన మొదటి పత్రిక పాలు తిమోతికు రాసిన అగరె పత్రిక అగరె కొత్త

గుట్టో తిమోతి పత్రిక అపో. పాలు తా సిస్యుడైలా తిమోతికు రాసితల్లా పత్రిక. యే పత్రిక క్రీస్తు జొర్నైలా 62-64 యె మొజికలై రాసికిరి రొవ్వొచ్చు. యే పత్రిక పాలు జీవితంరె చివరిగా రాస్తల్లా పత్రిక. యే పత్రికె పాలు తిమోతి గురించి తా సొంత పో గా బడేసార్లు కొయివురో యీసి. పిలిప్పీ 2:22; 1 తిమోతి 1:2,18.

పాలు సంగముకు బదులుగా మనమాన్రో నానె సంగరె రాసిలా చార ఉత్తరాలై యెడ గుటె. తల్లాంచ 2 తిమోతి, తీతుకు, పిలోమోను. యే గుట్టో తిమోతి పత్రికరె బడే సూచనలునె దీసి. తాండె సంగం ప్రార్థన గురించి 2:1-15 ఇంకా సంగం బొడిదిల్లలింకెరొ అర్హత గురించి 3:1-13 ఇంకా సారొబోదకు గురించి హెచ్చరిక 1:3-11; 4:1-5; 6:2-5 యెడకు దరికిరి పాలు సంగాలు మొజిరె బొట్టాలింకెగా క్యాకిరి తమ్మాసా తొమోతికు తర్పీదు దివ్వరో. యే గుట్టో తిమోతి పత్రికరె సంగబొడిలింకెకు ఇంకా స్త్రానికనాయకులు సంగముకు క్యాకిరి సలిపించిమాసో బడే సిద్ధాంతాలు ఉంచినెదాకా ఉపయోగించిగిల్లాపనికిరి అచ్చె.

సంగతీనె

1. పాలు తిమోతికు సుబాలు కొయికుంటా ఆరంబించువురో. 1:1-2
2. పాలు తిమోతికు సారొబోదకులు గురించి జాగర్తబులి హెచ్చరించువురో. 1:3-11
3. పాలు యేసుక్రీస్తుకు కేవిదంగా క్రుతజ్ఞుడైకిరి అచ్చొ వివరించువురో. 1:12-19
4. పాలు తిమోతికు ఆరాధన గురించి, సంగబొడిలింకె గురించి సూచనలు దివ్వరో. 2:3

5. పౌలు తిమోతికు చివరి సూచనలు దీకుంటా ఉత్తరముకు ముగించువురో. 4:6

దండము

¹ అం రక్తకుడైలా పురువు వల్లరె అం నిరీక్సన యీల క్రీస్తుయేసు రొ ఆజ్ఞ ప్రకారము క్రీస్తుయేసు రొ అపొస్తలుడు యీలా పౌలు రాసితల్లా సంగతీనె.

² విస్వాసము వల్లరె మో సొత్తెల పో యీలా తిమోతికు సుబం బులి కొయికిరి రాసిసి. బో యీలా పురువుసంగరె అమె ప్రబువైల క్రీస్తుయేసు దీకిరి క్రుప కనికరముకు సమాదానము తొత్తె కలుగుసి గాక.

సారోబోదకు నాకొరుకుంటా గద్దించువురో

³ మియ్యి మాసిదోనియకు జేతన్నుగా సారోబోదానె కొరితల్లా కుండెలింకు హెచ్చరించితందుకు మియి తొత్తె ఎపెసురె రొమ్మాసిబులి ఆజ్ఞాపించించి.

⁴ కల్పించిల కతానె హద్దులునీలా వంసావలీనె, విస్వాస సంబందమైలా పురువురో ఏర్పాటు నీకుంటా వివాదము పుట్టించితల్లా ఎడానుకు నడదిమ్మాసిబులి తంకసంగరె కో బులిసి.

⁵ ఉపదేసం సారము కిరబుల్నే, బొల్ల హ్రుదయందీకిరి, బొల్ల మనసాక్సిదీకిరి, నిస్కపటమైలా విస్వాసముదీకిరి కలిగితల్లాట ప్రేమాక.

⁶ కుండెలింకె యెడానుకు నడికిరి బాజీకిరి, తంకె నాపైటికైలా బోదానెరె పొడిజీనె.

⁷ తంకె కొయిలాట యీనెను, నిచ్చయమైలపనికిరి రూడిగా కొతానెకైనెనూ అర్థం నాకొరిగిన్నార్నన్నా దర్మసాస్త్రంరొ ఉపదేసకులైకిరి రొమ్మాసి బులిగిల్లీనె.

⁸ దర్మసాస్త్రము నడ ఉపయోగించిలాటకు దరికిరి, నడ బొల్లబులి అముకు తెలుసు.

⁹ ఈనె యే దర్మసాస్త్రము బొల్లలింకు కోసం దిల్లానీబులి జ్ఞాపకం దీగిండి. దర్మవిరోదూనెకు, అవిదేయునెకు, బక్తిహీనునెకూ,

పాపొనెకూ, అపవిత్రునెకూ, మతదూసకునెకూ, మా బోనుకు మొరదిల్లాళింకూ, నరహంతకునెలింకాక.

10 ఇంకా దర్పిపైటికొల్లాళింకు, పురుసుసంయోగులుకు* మనమానుకు చొరిపీలాళింకు, చొరొకొతానె కొయిలాళింకు, చొరొకొతాలగిలలింకు, చొరొసాక్సం కొయిలాళింకు, ఇంకా బొల్లబోదకు విరోధంగా కొతలగిలాళింకు దీసి.

11 మహిమగల్లా ఆసిర్వాదముకు కారనమైలా పురువుదీకిరి మెత్తె ఒప్పుకొయిలా యే ఉపదేసము నువార్తలురె రొయిదివ్వొరొ ఈసి.

పురువురొ కనికరముకు క్రుతజ్ఞతలు

12 మెత్తె బలపరిచికి తా పరిచర్యకు నియమించికిరి అమె నమ్మకైలాట పనికిరి బచ్చిగిల్లా ప్రబువుయిలా క్రీస్తు యేసుకు క్రుతజ్ఞతలు చెల్లించిలిం

13 కైంకిబుల్నే అగరె కల్రె దూసింబిలాట, హింసింబిలాట, బాదింబిలాటైలా మెత్తె, పురువుంపరె విస్వాసం నీనన్ననూ, కిరకొరిలింబొ మీ నాజనినన్నా. పురువు మో ఉంపరె కనికరము దిగదీసి మియి నా తెలిసికిరి అవిస్వాసము వల్లరె కొరించి గనక కనికరింపబొడించి.

14 ఈనె అం ప్రబువురొ క్రుప, క్రీస్తు యేసు ద్వారా విస్వాసమును ప్రేమ, అత్యధికముగా అనుగ్రహించిసి.

15 మియి సొత్తాక కొయిలింబి పాపొనెకు రక్సంచితె క్రీస్తుయేసు లొకొకు అయిలాపని వాక్యము నమ్మితె పూర్వాంగికారమైలాట. సే పాపొనె బిత్తరె మియ్యి అగరోట.

16 ఈనెను నిత్యజీవము నిమిత్తము తాకు విస్వాసింబిలాళింకు మియ్యి మాదిరిగా రొల్లపనికిరి యేసు క్రీస్తు తా పూర్వమైలా దీర్గసాంతముకు సె ప్రదాన పాపియిలా మోవుంపరె దిగిదీలాపనికిరి మియ్యి కనికరింపబొడించి.

* 1:10 మొదటపానెనంగరె గత్తపైటినె కొరిలాళికె .

17 సకల యుగమునెరె రొజైకిరి, అద్రుస్యుడైలా అద్వితీయ పురువుకు గనత మహిమ కెబ్బుకూ కలిగిమాసి.

18 మో పోయాలా తిమోతి, తువ్వు విస్వాసమురె బొట్ట మనస్సాక్కి కలిగిలాటయీకిరి, తో కోసం అగరాక కొయిలా ప్రవచనములు, ఏ బొట్ట పోరాటం పోరాడివాసిబులి నడకు ఏ ఆజ్ఞకు తొత్తె అప్పగించిలించి.

19 బొట్ట మనస్సాక్కికు కుండిలింకె వొంకిదీకిరి, విస్వాసంరె తొలిగిజికిరి అచ్చె.

20 తంకె బిత్తరె హుమెనై, అలెక్సంద్రు అచ్చె. అంకె ఇంకా నాదూసించకుంటా సిక్కింపబొడితాక సాతానుకు అప్పగించి.

2

సంగమురె ఆరాదన

1 అగుంతా తొమల్లా ప్రజానె కోసం పురువుకు ప్రార్థనలు, విజ్ఞాపనలు, క్రుతజ్ఞతలు కొరుమాసిబులి ఆజ్ఞాపించిలించి.

2 అమె నెమ్మదిగా, సుకముగా జితే నిమిత్తము, బుల్సే, రొజానె కోసం, అదికారినెసాబ్బిలింకె కోసం, పొదరలింకె కోసం విజ్ఞాపనానె, ప్రార్థనలు కొరొండి.

3 యడ బొట్ట అమె రక్కకుడుయిలా పురువురొ అంకికి అనుకూలమైకిరి అచ్చి.

4 తా, మనమానె సాబ్బిలింకె రక్కనకడిగీకిరి సత్యము గురించి అనుబవజ్ఞానముగలిగిల పనికిరి రొమ్మంచెబులి ఆసపొడిలీసి.

5 పురువు జొన్నాక, పురువుకు మనమానెకు మొజిరె తల్లాట జొన్నాక; సెయ్యె క్రీస్తుయేసు బుల్లా మనమ.

6 సెయ్యె సాబ్బిలింకు కోసం విమోచన కలిగిమంచెబులి తాకు సెయ్యాక సమర్పించిగినిసి. యడ గురించిలా సాక్యము దీతె సరైలా కలొరె దివ్వొరొయిసి.

7 ఏ సాక్యము దీతందుకు మియ్యి ప్రకటించిలంకెపని, అపొస్తులుడుగా, విస్వాసము, సత్యము వినయమురె పురువుకు నా

నమ్మిగిలలింకు బోదకొలలింకెగాను నియమించిసి. మియ్యి సారొకొతా కొయిలాని సొత్తాకా కొయిలించి.

8 ఈనె ప్రతిస్తలమురె వొండ్రపొ రగ్గొకు వాదనలకు సడికిరి, పవిత్రమైలా అత్తోనె సంగరె ప్రార్దన కొరిమంచెబులి కొరిగిల్లించి.

9 ఈనె తిల్లాపిల్లానె అనుకువుగా తైకిరి, స్వస్తబుద్ధి గలిగిలాట ఈకిరి, సరైలా కొన్నానె పిందిగీకిరి, సోకుజటానెదీకిరి ఈనెను, సున్నదీకిరి ఈనెను, ముత్యములుదీకిరి ఈనెను బడె కరీదైల కొన్నానె సంగరె అలంకరించిగిన్నాసి.

10 ఈనె పురువురొబక్తి కలిగిలా తిల్లాపిల్లనుకు, తగిలపనికిరి బొట్టపైటీనె సంగరె తంకు తంకాక అలంకరించిగిమ్మాసి.

11 తిల్లాపిల్ల వల్లాగ రొయికిరి, సంపూర్ణ విదేయతదీకిరి సుగ్గీమంచి.

12 తిల్లాట వల్లగా రొమ్మంచిగాని, ఉపదేశంచితె ఈనెను, వండ్రపొ ఉంపరె బోడతనం కొరితె ఈనెను తాకు అదికారం దిల్లానీ.

13 అగరె ఆదాముకు తరువాతరె హవ్వకు నిర్మించబొడిసె నీనా?

14 ఈనె ఆదాము మోసపొడిచిలాని గాని, తిల్లాట మోసపొడికిరి పురువురొ ఆజ్ఞకు మీరిసి.

15 ఈనెను తంకె స్వస్తబుద్ధి కలిగికిరి, విస్వాస ప్రేమ, పరిసుద్ధతసంగరె నిలకడగాటారికిరి తన్నె, సిసుప్రసూతి సంగరె సెయ్యె రక్సింపబొడిసి.

3

సంగ నాయకులురొ అర్హతలు

1 కేసెనైను సంగమురె బోడోపదవి ఆసించిలపనా సెటెలింకు బొడొపైటీ అపేక్కించించిలీసా బులి కొతా నమ్మదగిలాట.

2 బోడ మనమ యీలట నిందారహితుడును, జొన్నాక నైపొ వండ్రపొకు, మితానుబవుడును, స్వస్తబుద్ధిగలిలలింకె,

మర్యాదదిల్లలింకె, అతిదిప్రియుడుకు, బోదించితె తగిలాటైకిరి తమ్మాసి.

3 మొద్దొ నాపీలాటైకిరి తవ్వాసి, రగ్గొ తన్నాసి, సాత్వికుడైకిరి మర్యాద తైకిరి, కొలీనె నాలగిలాట పనికిరి, పలియ ఆస తన్నాసి.

4 సంపూర్న మాన్యత కలిగికిరి, తా పిల్లానుకు బొట్ట బట్టొరె సలిపించిగికిరి, తా గొరొలింకు బొల్లెవలిలాటైకిరి రొమ్మంచి.

5 కేసైనెనూ తా గొరొలింకు సరిగా దిగినార్నే, సెయ్యె పురువురొ సంగముకు క్యాకిరి దిగిపారి?

6 సెయ్యె గర్వాందుడైకిరి తన్నాసి, అపవాదికు కలిగిలా సిక్సావిదికి నాలోబడితాపనికిరి పరిపూర్న విస్వాసం కలిక్కిరి తమ్మాసి.

7 ఈనె సెయ్యె నిందపాలు నాయాకిరి, మనమానె సొబ్బిలింకు సంగరె గొరవించబొడిమాసి. అపవాది వలరె నా పొడుకుంటా, సంగము బయలురె బొట్ట సాక్స్యము కలిగిలాటపనికిరి రొమ్మంచి.

సంగమురె పరిచారకులురొ అర్హతలు

8 సాకిరాక పరిచారకులు మాన్యులైయికిరి, దీరజిబ్బొ కలిగిలాలింకె, మొద్దొపికారీనె, దుర్లాబముకు ఆసించిలాలింకె పనికిరి రొన్నాసి. బొట్ట బుద్ధి కలిక్కిరి రొమ్మాసి.

9 తంకె పవిత్రమైలా విస్వాస సత్యంకు పవిత్రమైలా మనస్సాక్సి దీకిరి కొయితె కలిక్కిరి రొమ్మంచి.

10 ఈనె తంకె అగరె పరీక్షింపబొడిమంచి. తరువాత తంకె అనిందులు ఈనె పరిచారకులుగా రొవ్వొచ్చు.

11 సాకిరాక పరిచర్యకొరిలాలింకెరో నైపోనె పొదరలింకు గొరవించికిరి, బొట్ట గునొ కలిక్కిరి, నీలాకొతానె నాకొయిలలింకె పనికిరి, తగ్గించిగిల్లా స్వభావము కలిగీకిరి, సొబ్బి వినయములరె నమ్మకంగా రొమ్మంచి.

12 పరిచర్య కొరిలాలింకు జొన్న నైపోక తవ్వాసి. సెయ్యె తా పిల్లలకు తా గొరొలింకు బొల్లె దిగిమ్మాసి.

13 పరిచారకులు ఈలలింకె సే తా పైటి బొల్లే కొరిలాటైకిరి తమ్మాసి. బొల్ల పదవికు సంపాదించిగీరి క్రీస్తుయేసు బిత్తరె విస్వాసం దీకిరి బడే ధైర్యము కలిగిలాలింకె యీపారె.

గొప్పీట యితె మర్మము

14 తో పక్కు బేగా అయికిరి తొత్తె దిగిమాసిబులి నిరీక్సన సంగరె యే ఉత్తరం తొత్తె రాసిలించి.

15 ఈనెను మియ్యి ఆలస్యం కొరువురొ వల్లరె పురువురొ మందిరమురె, జీవముగల పురువురొ సంగమురె, తువ్వకాకిరి ప్రవర్తించిమాసా సెడ తొత్తె జనిమంచి బులి యే సంగతినెకు తొత్తె రాసిలించి. సె సంగము సత్యమునకు ఆదారమైకిరి అచ్చి.

16 ధైవ బక్తి గురించి కేసే నిరాకరించినార్లా నుచ్చిదిల్లా సంగతి అచ్చి. సెయ్యె ఆత్మద్వారా నీతిపరుడుబులి దిగిపించబొడికిరి

మనమరూపం దరించిగీకిరి

దేవదూతానె సంగరె దిగదూసి.

సెయ్యె ప్రపంచరె రొల్లాసొబ్బిలింకె నమ్మిలాపనికిరి

సొబ్బి దెసొనై రక్సన ప్రకటించికిరి

సెత్తెలెపరలోకముకు ఆరోహనమైజోసి.

4

సొరొబోదకులు

1 ఈనె ఆత్మ తేటగా కయివురొ కొయిలాట కిరబుల్నే, యే చివరి దినోనై కుండెలింకె సొరొకొతా వేసదారన వల్లరె మోసంకొల్లా ఆత్మలదీకిరి. బుత్తొనె బోదరె లక్ష్మం లొక్కిరి, విస్వాస బ్రస్తునె ఈజేసి.

2 సె సొరొకొతా, సుర్రకా పొగిల మనస్సొక్కియాలాలింకె పని చెడు బోధ కొరిలీసె.

3 బ్యా సెనీదించికిరి, సత్యవిసయమైకిరి అనుబవజ్ఞానముగల విస్వాసీనె క్రుతజ్ఞతాస్తుతులు చెల్లించికిరి కడిగిల్లా నిమిత్తము పురువు స్రుష్టించిలా కద్ది వస్తువునుకు కుండె కైయివురొ మానిపింపించెబులి కొయిలీసె.

4 పురుషు స్రుజించిలా ప్రతి వస్తువు బొట్టాక. క్రుతజ్ఞతాస్తుతులు చెల్లించికిరి కడిగిల్లాబెల్లె కిచ్చి కూడా నిసేదించిలాటనీ.

5 క్యాకిరిబుల్నే సడ పురువురో వాక్యము వల్లరె ప్రార్థన వల్లరె యీనెను పవిత్రం కొరివురో ఊసి.

యేసు క్రీస్తురో బొట్ట సేవకుడు

6 ఏ సంగతీనెకు అన్నబయినెకు వివరించినె, తువ్వు అనుసరించికిరి అయితల్లా విస్వాస సుబోద సంబందమైలా వాక్యము సంగరె బొడుకుంటా క్రీస్తుయేసుకు బొట్ట పరిచారకుడయికిరి తాను.

7 అపవిత్రమైలా మొంత్రినె కొతానె సడిదికిరి, దేవబక్తి వినయమురె తొత్తె తువ్వు సాదకము కొరిగును.

8 దే సంబందమైలా పైటి కుండెమట్టుకు ఉపయోగంవుసిగాని దైవబక్తి ఉంచినె జీవం వినయమురె అయితల్లా వినయమునెరె వాగ్దానము సంగరె కూడా సొబ్బి వినయమురె ఉపయోగకరంగా ఊసి.

9 ఏ వాక్యము సత్యమైలాట సడకు నమ్మిలాట పూర్వాంగికారముకు యోగ్యమైకిరి అచ్చి.

10 మనమానెసొబ్బిలింకు రక్సకుడు, ఈనె విసేసముగా విస్వాసులకు రక్సకుడైలా జీవముగల పురువురె అమె నిరీక్సన రొగ్గించొ గనుక యడ నిమిత్తము ప్రయపొడికిరి పాటుపొడిలించ్చొ.

11 ఏ సంతలు తంకు కొయికిరి బోదించొడి.

12 తొ బెండకలో కేసెను తొత్తె సన్నిదిగ నాదికుంటా, కొతానెదీ, ప్రవర్తనదీ, ప్రేమదీ, విస్వాసముదీ, ప్రవిత్రరె, విస్వాసునెకు మాదిరిగా రొండి.

13 మియ్యి అయిలా జాంక చదివిలాటరె, హెచ్చరించిటిరె బోదించుటరె జాగర్తాగ రొండి.

14 బొడిలింకె హస్తనిక్నేవనము కొరిలాబెల్లె ప్రవచనము తొత్తె అనుగ్రహించబొడిలాబెల్లె తొబిత్తరె ఆత్మ వరముకు నిర్లక్యం కొరితెనా.

15 తొ అబిప్రుద్ది సొబ్బిలింకు తేటగా దిగిదిల్లా నిమిత్తము ఎడకు మనుసుపూరు సాదన కొరొండి.

16 తో గురించి తో బోద గురించి జాగ్రత్త కలిగ్గిరో. ఎడబిత్తరె బొల్లకిరి రో; తువ్వు యాకిరి కొరికిరి తువ్వు తో బోద సునిలాలింకు రక్షించుగునును.

5

పొదరెలింకంపరె విస్వాసులురో బాధ్యత

1 బోడిలింకు నాగద్దించుకుంటా బోపనికిరి బావించికిరి కోండి. బెండలింకు అన్నబయినెగా బావించిగిండి.

2 వయసురె బొడుమొట్టానెకు మానె పనికిరి బులిగిండి, పూర్తిపవిత్రతరె దిండ మొట్టానెకు అప్పబొయినె బులిగికిరిబావించొండి.

3 సొత్తాక అనాదులైలా రండిలింకు గౌరవించొండి.

4 ఈనె కె రండిలింకె యీనెను పిల్లానె గాని నత్తిని గాని నత్తి గాని రొల్లాపనెనే, అంకె అగరె తా గొరొలింకు బక్తి దిగదీతె, తంకె మా బోకు ప్రత్యుపకారము కొరితందుకు సుగ్గిమ్మంచె; యెడ పురువురో అంకికి బొల్లకిరి అచ్చి.

5 ఈనె సొత్తాకా కేసేనీలా రండింట జొన్నాక తన్నె, పురువు ఉంపరె తా నిరీక్సనరొయిదిగికిరి, విజ్ఞాపనలబిత్తరె ప్రార్థనబిత్తరె రత్తిదూసు పురువు సహాయం కోసం దిగిమంచె.

6 సుకబోగములుబిత్తరె ప్రవర్తించిలాట జీకిరి రొన్నన్నా మొరిజిల్లాలింకె పనికిరి అచ్చి.

7 తంకె నిందారహితులైకిరి రొల్లాపని యాకిరి ఆజ్ఞాపించండి.

8 ఈనె కేసె యీనెను స్వకీయునెకు, విసేసముగా తా గొరొలింకు, నాసంరక్షించిగిన్నే సెయ్యె విస్వాసత్యాగము కొరిలాటపనికిరి అవిస్వాసికన్నా చెడ్డాటైకిరి తాసి.

9 అరవై బొచ్చొరోనె కన్నా తక్కువ వయస్సు నీకుంటా, జొనె వండ్రపోకాక నైపోయాకిరి తన్నే రండింటగా గొనివొచ్చు.

10 ఈనె బొల్లక్రియలకు నా కడిగిల్లా రండింట తా పిల్లనెకు పుసికిరి, పరదేసునెకు ఆతిద్యందీకిరి, పరిసుద్దులురో గొడ్డెనె దొయికిరి,

సమపాడిలాలింకు సహాయము కొరికిరి, ప్రతి సత్కార్యము కొరితె సమర్పించిగిమ్మాసి.

11 ఈనె బెండలింకయిలా రండిలింకు లెక్కరె చేర్చిగిత్తెనాండి; కిరకుబుల్నే అంకె క్రీస్తుకు సడికిరి లొకొ ఆసానెరె పొడికిరి ఇంకా బ్యా కొరిగిమ్మాసి బులిగివ్వె.

12 ఈనె తంకె అగరెకొరిలా ప్రమానంకు సడదీసెబులి తీర్పుపొందిలాలింకైకిరి అచ్చె.

13 ఈనె తంకె గొరొ గొరొకు బుల్లుకుంటా, సామరులయితె మాత్రమాక నీకిరి, నాకొతలగిలా కొతానెకొయికుంటా, పొదర్లింకెజోలికు జేకుంటా అచ్చె. సమాయంకు వ్యేదం కొరికుంటా కలిగిలలింకె పనికిరి తాసె.

14 గనక దిండతిల్లపిల్లనె బ్యాకొరిగీకిరి పిల్లనె బేయికిరి గొరొకు జాగర్తాగ దిగ్గీకుంటా, నిందించితె విరోదికు అవకాసం దివ్వరొ బొల్లనీబులికొరిగిల్లించి.

15 యెడకగరాక కుండిలింకె బట్టోదీకిరి బాజీకిరి సాతానుకు వెంబడించినె.

16 విస్వాసురాలైలా కె మొట్టరొ గొరొయినెను కుటుంబంరె యినెనూ రండిలింకె తన్నెమాను, సంగముకు బారమునీకుంటా రండిలింకు సహాయము కొరొండి. సెల్లె సంగం సొత్తాక దిక్కునీలాలింకు సాయంకొరిపారి.

17 బొల్లకిరి పాలనకొరిలా బొడిలింకె, వినేసముగా వాక్యమురె సుక్కిలాబిత్తరె, ఉపదేసము కొయిలాటబిత్తరె ప్రయాసపొడిలాలింకె, దీటొతునె సన్మానముకు అర్హులుగా బచ్చిమంచె.

18 సడకు లేకనము కొయిలాపనికిరి నూర్చితల్లా ఎద్దురొముతికు చిక్కుము పొగితెనాండి కిరుకుబుల్నే పైటితా బొర్తొనొకు అర్హతయిలాట.

19 ఈనె దీలింకె తిల్లింకె సాక్సీనెరొన్నె గాని బొడిలింకె ఉంపరె నిందకు అంగీకరించితెనా.

20 పొదరిలింకె డొరెపొడిలా పనికిరి పాపము కొరిలాలింకు సాబ్బిలింకె అగరె గద్దించు.

21 దుష్టబుద్ధి సంగరెయినెను పక్ష్పపాతము సంగరెయినెను కిచ్చినాకొరుకుంటా, మియ్యి మీ కొయిలా కొతానుకు సునిమంచెబులి పురువు అగరె, క్రీస్తుయేసు అగరె, బచ్చిగిల్లా దేవదూతానె అగరె తొత్తె గద్దించిలించి.

22 పురువు పైటికోసం బచ్చిగిత్తె బేగా కా అంపరె యినెను అత్తొపొగితెనాండి. పొదరిలింకెరో పాపమురె పాలితాయాకిరి రొయితనాండి. తువ్వు పవిత్రముగా రొల్లాపనికిరి దిగ్గును.

23 ఈనె పనినాపీకుంటా తో పెట్టో జబ్బుకు కెబ్బుకూ అయిలా బలహీనతానె కోసం ద్రాక్సారసము కూడా కుండె కడిగునొండి.

24 కుండెలింకె పాపము బొల్లె దోరెపొడికిరి న్యాయపు తీర్పుకు అగరాక సలిలీసె, ఈనె ఇంకా కుండెలింకెరో పాపొనె తంకె సంగరె జెల్లీసె.

25 సాకిరాక బొల్లె పైటినె బొల్లె దీగదిల్లీసె, సుచ్చిలాట కిచ్చి దోరెనాపొడుకుంటా రొన్ని.

6

1 పురువురో నాకు, తా బోదకు నాదూసించిలాపనికిరి దాస్యత్వముబుల్లా కాడి తొల్లె రొల్లాలింకె తంకరో యజమానులుకు సంపూర్ణమైలా గనతకు అర్హులుబులి బచ్చిమంచె.

2 విస్వాసులైలా యజమానునె గల్లా దాసునె తంకె యాజమానునె అన్నబయినె బులిగీకిరి తంకు నాసడిదీకిరి, తంకె సేవాపలము పొందిలాలింకె విస్వాసునెకు ప్రియులైకిరి అచ్చెబులి ఇంక బడే ఎక్కువుగా తంకు సేవ కొరిలాపనికిరి రొమ్మించి.

సారోబోదానె సొత్తైలా సంపద

ఏ కొతానె బోదించిలింకు హెచ్చరించొండి.

3 కేసైయినెను అం ప్రబువైలా యేసుక్రీస్తురో గుట బొల్లెకొతానెకు, దైవబక్తికి అనుకూలమైలా బోదకు నాఅంగీకరించుకుంటా, బిన్నమైలా బోదానె కొర్నే,

4 సెయ్యెకిచ్చి నాజనికిరి కొలీనె గురించి వాగ్వాదమునె గురించి అనవసరంగా ప్రయాసపొడుకుంటా గర్విస్తుడైవో. ఎడవల్లరె దిగినార్లాబుద్ధి, కలహము, దూసనానె దురనుమానాలు,

5 తంకె చెడిజిల్లా మనస్సు కలిక్కిరి సత్యమునీలా బడేవివాదాలు దీగీకిరి పురువురో బక్తి కొరువురో వల్లరె బడే లవో ఆసి బులిగితోసె.

6 అమె కలిక్కిరితల్లాట సంగరె, సొత్తయిల పరినుద్దత తాకు కెత్తోలవో.

7 అమె యే లోకొకు కిచ్చి దన్నయిలనింతో, ఆండ్రెదీకిరి కిచ్చి దరిగిజెన్నారో.

8 ఈనె కద్ది, కొన్నానె కలిగికిరితన్నె సడసంగరె త్రుప్తి పొడికిరి రొమ్మండి.

9 పలియగలిగిలాలింకె ఈవాసి బులి ఆసపొడిలాలింకె తంకె సోదనరె, మోసరె, అవివేకమైలా కొస్తొనెరె దురాసలురె పొడునె. ఈనె సాటానె మనమానుకు నష్టమురె నానమురె బుడ్డిపూసె.

10 క్యాకిరిబుల్నే పలియాస సమస్తమైలా కీడుకు కారనం. కుండిలింకె సడకు ఆసింకికిరి విస్వాసముదీకిరి బాజీకిరి బడే బాదానె వల్లరె తంకు తంకాక బుసిగివ్వె.

వ్యక్తిగతమైలా హెచ్చరికలు

11 ఈనె పురువురో మనమా! తూ ఈనె యెడకల్లాసడిదీకిరి, నీతికి, బక్తికి, విస్వాసముకు, ప్రేమకు, ఓర్పుకు, సాత్వికముకూ సంపాదించిగితై ప్రయాసపొడండి.

12 నిత్యజీవము పొందితె తొత్తై తువ్వాక బొల్ల పోరాటం పోరాడు. సడకు పొందిగినితే తువ్వు పురువుదీకిరి డక్కబొడికిరి బడే సాక్కులగరె తువ్వు బొల్ల ఒప్పుకోలు కలిగీకిరి తల్లందరె సే జీవం కోసం తొత్తై డక్కిగిచ్చి.

13 సొబ్బిజీవీనెకు ఆదారమైలా పురువు అగరె, క్రీస్తుయేసు అగరె, పొంతి పిలాతు పక్కరె ధైర్యముగా ఒప్పిగీకిరి, సాక్సం దిల్లా క్రీస్తుయేసు అగరె తొముకు ఆజ్ఞాపించిలించి.

14 అం ప్రబువైలా యేసుక్రీస్తు అయిలాజాంక తువ్వు నిస్కలంకముగా, నిందనీకుంటా యే ఆజ్ఞానె అంగీకరించికిరి సలిగీకిరి విస్వాసం సంగరె రొమ్మాసి బులి తొత్తె ఆజ్ఞాపించిలించి.

15 ఆసీర్వాదం కారకుడు, సర్వాదికారి సరైలకలోరె సే ప్రత్యక్షతకు దిగుదూసి. సెయ్యాక సర్వాదిపతి రొజానుకు రొజా, ప్రబువూనెకు ప్రబువైకిరి ఆసీర్వాదానెకు కారకుడైకిరచ్చి.

16 కేసే నాజెన్నార్లా తేజస్సురె సెయ్యె మాత్రమాక తైకిరి మొర్నొనీలాట యికిరచ్చి. మనమానె కేసే తాకు దిగిలాంతె, కేసే దిగిలారె. తాకు గనత సాస్వతమైలా ప్రబావము కలిగీకిరి తాసి.

17 యే లొకొరె పలియగలిగిలాలింకె గర్వంనాపొడుకుంటా, స్తిరమునీలా పలియంపరె నమ్మకం నారొగ్గీకుంటా, సుకముగా అనుబవించితె సొబ్బీఅముకు బడే బూతు దీతల్లా పురువుంపరె నమ్మకము దీగిమంచిబులి ఆజ్ఞాపించు.

18 బొల్ల పైటీనె బుల్లా పలియ కలిగిలాలింకె, దానగునం కలిక్కిరి, తంకపలియరె పొదర్లింకు బాగందిల్లాలింకైకిరి తమ్మాసిబులి తంకు ఆజ్ఞాపించు.

19 తంకె సత్యమైలా నిత్యజీవమును సంపాదించిగితై నిమిత్తము, అయితల్లా కలొకు బొల్లపునాది తంకోసం పొగ్గుచ్చె.

20 ఓ తిమోతి, తొత్తె అప్పగించిలాటకు కాపాడిగీకిరి, అపవిత్రమైలా సుచ్చు కొతానుకు, జ్ఞానం బులి మాయకొతానె కొయిలా మూర్ఖంగా దొందర్లాలింకు దూరుగాతాండి.

21 సే విసయమురె ప్రవీనునె బులి కుండిలింకె కొయిగీకిరి విస్వాసవిసయమురె తప్పిజీసె. పురువురొ క్రుప తొత్తె తోడుగా తమ్మాసి.

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9